



## Publicaziuns dalla vischnaunca, jamna 51

### Cussegl da vischnaunca

#### Rapport dalla seduta dils 11-12-2020

En sia seduta dils 11 da december 2020 ha il cussegl da vischnaunca sut il tgamun da Mario Flepp tractau e decidiu suandontas duas fatschentas:

#### Parcadi sutterran a Sogn Gions

Ils 26 da settember 2010 ha la cuminonza da votantas e votants concediu alla Fundaziun Casa da tgira Sursassiala (oz Fundaziun Puntreis) il dretg da baghegiar per la parcella 962. Quei ei stau la premissa per saver realisar l'engrondaziun previda dalla Casa da tgira Sursassiala. En quei mument ha la vischnaunca nezegiau la caschun d'ereger 13 parcadis sutterrans. Il diever da quels parcadis sco parcadi permanent ei entochen ussa buca staus fetg gronds. Ils 23 da settember 2020 ha la Fundaziun Puntreis suttamess alla suprastonza communal la damonda da cumprar ils 13 parcadis sutterrans a Sogn Gions.

La Fundaziun Puntreis vul sesviluppar ed augmentar sias purschidas per rinforzar la vischnaunca da Mustér sco subcenter sil sector da sanadad. Plinavon vul ella augmentar l'attractivitat dallas piazzas da lavur ella Puntreis cun diversificar las purschidas sin siu areal. Entras la construcziun dil niev baghetg vegnessen parcadis existents sligiai. Cun la cumpra dils 13 parcadis sutterrans dalla vischnaunca savessen quels parcadis vegnir cumpensai.

El niev baghetg ha la Puntreis previu da dar p.ex. la pusseivladad d'integrar la basa d'ambulanza, la Spitex Cadi, terapias, structura dil di per attempai sco era autras purschidas. Quei augmentass l'attractivitat dallas piazzas da lavur a Mustér e creass novas piazzas.

Il cussegl ha decidiu cun 12 encunter 0 vuschs (duas abstenziuns) da vender ils 13 parcadis el parcadi sutterran a Sogn Gions alla Fundaziun Puntreis pil prezi da frs. 435 000.–.

#### Revisiun parziala dil regulativ da menaschi dil Center Fontauna

Suenter haver fatg in'adattaziun e completaziun digl artechel 4 (cumposiziun) ha il cussegl da vischnaunca approbau unanimamein la revisiun parziala dil regulativ pil menaschi dil Center Fontauna.

*Suprastonza communal*

---

#### Referendum facultativ

A caschun da sia seduta dils 11 da december 2020 ha il cussegl da vischnaunca decidiu cun 12 encunter 0 vuschs (duas abstenziuns) da vender ils 13 parcadis el parcadi sutterran a Sogn Gions alla Fundaziun Puntreis pil prezi da frs. 435 000.–.

Conform ad art. 21 lit. d dalla constituziun communal ei quella decisiun suttamessa al referendum facultativ. Il messadi davart quella fatschenta ei exponius per investa en casa communal (stanza nr. 10).

Enteifer 20 dis dapi la publicaziun ufficala han 80 votantas e votants la pusseivladad d'inoltrar enviers sura conclus il referendum e pretender ina votaziun dil pievel.

*Suprastonza communal*

---



### Referendum facultativ spirau

Ils 13 da november 2020 ha il cussegl da vischnaunca, suenter haver fatg entginas adattaziuns, approbau unanimamein il preventiv 2021.

Encunter quella decisiun ei enteifer il termin fixau buca vegniu fatg diever dil referendum, aschia ch'ella ha contonschiu vigur legala.

*Suprastonza communal*

---

### Invitaziun alla seduta constitutiva dil cussegl da vischnaunca

**Venderdis, ils 8 da schaner 2021** allas 20.15 ha liug en halla polivalenta el Center Fontauna la seduta constitutiva dalla nova perioda d'uffeci 2021/2024. La seduta vegn enramada d'entginas producziuns musicalas. Sut la resalva da novas mesiras da protecziun davart il coronavirus ei quei arranschament publics.

#### Tractandas:

1. Avertura entras il president communal
2. Undraziuns
3. Appel
4. Elecziuns:
  - 4.1 da dus dumbravuschs e dus suppleants per 2021/2024
  - 4.2 dil president dil cussegl da vischnaunca per 2021
  - 4.3 dil vicepresident dil cussegl da vischnaunca per 2021
  - 4.4 dalla actuara dil cussegl da vischnaunca per 2021/2024
  - 4.5 dil vicepresident communal per 2021/2024
  - 4.6 dalla cumissiun da baghegiar
  - 4.7 dalla cumissiun da menaschi Center Fontauna
  - 4.8 remplazzar in commember ella cumissiun da planisaziun
5. Agenda 2021
6. Communicaziuns

Cordials salids

*Il president communal en spe*  
*René Epp*

---

### Administraziun communal

Sur las fiastas da **Nadal** e **Daniev** resta l'administraziun communal **serrada** durant ils suandonts dis:

- **gievgia e venderdis, ils 24 e 25 da december 2020**
- **gievgia, ils 31 da december 2020**
- **venderdis, igl 1. da schaner 2021**

Nus giavischein ina biala fiasta da Nadal ed in bien e sanadeivel onn 2021!  
*Administraziun communal Disentis/Mustér*

---



**Bien di, bien onn!**

«**Quel che sa dir engraziel viva pli lev, ei satisfatgs e cuntents.**»

Nus vivin en in temps nua ch'il daner ha priu surmaun. Enstagl d'in sempel e beinvegniu «engraziel fetg» vegn meinsvart tratg la buorsa. Buca tut sto esser pagau, meinsvart vegness in «engraziel fetg» preferius.

Jeu engraziel a tut tgi ch'ei s'engaschau pil beinstar general duront igl onn vargau.

In engraziel fetg admittel cunzun a convischinas e convischins, collaboraturas e collaboraturs e funcziunaris ch'ei danovamein s'engaschai cun forza cumpleina dapertut nua ch'ei ha fatg basegns.

Da cor giavischel bialas e graziusas fiastas da Nadal ed in ventireivel e benediu 2021.

En num dalla suprastonza communal  
*Robert Cajacob, president communal*

---

**Controlla da habitonts**

**Naschientscha**

Leif Conradin, naschius ils 10 da december 2020, fegl da Larissa Fry Schuster e Tobias Schuster.

---